



**Hormuz lapoktsü atema US-i
atsüanem akatsüla: Iran**

**Jannik Sinner Cincinnati
Open masayatsü**

VOL. XXIII ISSUE NO. 299 (ADOK 299) DIMAPUR SANGTENNÜ (TUESDAY) LUROI (AUGUST) 11, 2026

₹ 5.00

BJP sorkari FCRA amshia Khristan rejutem mazüoktsüla: NPCC

Dimapur, August 10, 2026 (TYO): Centre nung BJP-i aniba sorkari Khristan rejutem, arogotem, NGOs aser civil society organisations anema FCRA framework akangshiba aitsür ta Nagaland Pradesh Congress Committee (NPCC)-i metetdaksüogo.

Nagaland aser India tesem balala nung Khristan teloktemi kümsa küm sorkari meinyaktetba aser metongjemba maparen balala inyaka arur. Khristan telok balalai schools, hospitals, orphanages, rehabilitation centres aser sensaker, shirangertem aser tangar memenepertem asoshi humanitarian programmes inyaka arur ta parnoki ashi.

BJP sorkari tashishitsü maliba nung amanger süra, ajak asoshi tashishitsü malitsüla. Saka kar dang shimteta, kar asoshi dang tenokdangba aser külen tsütsü ketdangsubaren ya "regulation" ta ashitsü makok ta Communication

Department, NPCC-i sangdong ka nung ashi.

Sorkari koba tamangba yimsü freedom aser koba suspicion ta lemtettsü atema Constitution-i temelaba agüja mali. Articles 14, 19 aser 25 ajanga equality, association aser religious freedom kümzüka ayur aser item constitutional guarantees madak sorkar shinga tashi mali ta NPCC-isa ashi.

Nagaland nung Khristan rejutemi education, healthcare aser social welfare nung mapang talangka shilem tajung agia aruba putiotsü tajung lir. FCRA ya ideological weapon ka tekümdaktsü. Tamangba yimsü atema Khristan rejutem dak temulung melemi tereprang aser political power o constitutional authority tebandang metetang. India ya tamangba yimsü ajak aser senso ajak meyong lir ta NPCC-isa metetdaksüogo.

I-Day sentongtem mokdangtsü ayonger

Guwahati, August 10, 2026 (Agencies): Assam aser Northeast kübok tangalen August 15, 2026 nü Independence Day sentongtem mokdangang ta United Liberation Army of Assam (Independent) aser NSCN/GPRN nati metetdaksüogo.

Parnoki India "Independence Day" anema noktaker aser iba tesem nugng lisopurtem Indian "occupation" aser "colonial rule" kübok lir ta August 10 nü ULFA(I) aser NSCN/GPRN külem sangdong ka nung ashi.

Assam aser Naga nunger yimtenren maitsü, putiotsü aser sobaliba khenyongi balaka lir aser asenok litsü nung India'er Independence Day benjung

mamungtsüla telok anatisa metetdaksü.

Taküm atema Independence Day ya general shutdown ama mayongzüker aser iba ya Assam nung tzümetsüng tensa atema lir ta telok anaprongisa metetdaksüogo.

Tzümetsüng ajanga teraksa jenti bentsür aruogo aser ajanga mokdang nungbo rescue, relief, rehabilitation & reconstruction efforts nung timtem ajurutsü. Anungji nübortemi Independence Day dak sendakba sentongtem mokdangtsü mepishir ta ULFA(I) aser NSCN/GPRN teloktemi shiogo.

Iba mokdang ya Assam, Arunachal Pradesh, Manipur aser Nagaland nung alitsü parnokisa ayongzüko.

NEZCC-i lendong balala nung akoksartem yaritsü

Dimapur, August 10, 2026 (TYO): Linük ajungalen Har Ghar Tiranga Abhiyan nung shilem ka ama North East Zone Cultural Centre (NEZCC)-i "Rhythms of Freedom - Tiranga Charity Concert" ayongzüker.

Iba sentong ya August 15 nikongdang 5:00 ako nung NEZCC Stone Sculpture Garden, Dimapur nung alitsü aser tawa alima lendong balala ajanga Nagaland nung takoksa ajururtem yaritsü.

Putiotsü nungi music, art aser tradition ajanga pelatepba mapang aser ano tejashi nunga kintem ka kümdaktsür. Iba ajanga nübortem nem teimla, tashi aser tasütait tanüla agütsür ta NEZCC-i metetdaksüogo.

Iba kenten sentong atema entry ticket jenjang Rs 100 asütsü aser sen aruba ajak Nagaland nung alima lendong

balala agi kongshia aliba kibongtem yaritsü.

"Rhythms of Freedom - Tiranga Charity Concert" indang tickets ya www.ahibi.in nung angutsü.

Iba sentong nung medentettsüpurtem asoshi QR code ka ajanga donation campaign ka tenzüko anungji nisung mashii kati tenla agütsütettsü. Iba QR code ya www.ahibi.in nung lir.

Iba sentong dak alia NEZCC-isa North East tesem balala nung Har Ghar Tiranga Abhiyan kübok sentong balala ayonga agir.

Shilpgram, Guwahati nung NEZCC-i CCRT den külemi August 12 nü Tiranga Concert ka host asütsü, August 14 nü Partition Horrors Remembrance Day (Vibhajan Vibhishika Smriti Divas) amungtsü aser August 15 nung Independence Day amungtsü.

Governor Yadav-i State Taxes Department den maparen repringshim



Dimapur, August 10, 2026 (TYO): Nagaland Governor Nand Kishore Yadav-i Lok Bhavan, Kohima nung Department of State Taxes den meyipa repringshiba senden ka menogo.

August 10, 2026 nü amenba senden nung Department-i osang tejanga lemsatepa liasü.

Dimapur, Kohima, Mokokchung aser Chümoukedima ta zone pezü nung active registered taxpayers 11,592 lir ta Department-i ashi.

FY 2024-25 nung tax collection Rs 1,427.03 crore liasü aser FY 2025-26 nung Rs 1,597.51 crore bendentet. Iba ya Rs 170.47 crore agi teimla bendenba liasü ta Department-isa ashi.

FY 2026-27 atema first quarter (April-June 2026) nung tax collection Rs 466.98 crore süogo aser iba ya yaküm dang nungi Rs 23.96 crore agi teimba lir ta parnokisa ashi.

SGST aser IGST densema GST collection indang osang lemsatepdang FY 2017-18 nung

Rs 187.57 crore bendenba nungi FY 2025-26 nung Rs 1,181.88 crore bendenteta liasü aser iba ya 530% inlokba lir ta Department-isa metetdaksü.

Department-i tax administration aser compliance tajungba akümtsü atema mapa aika tenzüko. G-RAMS (GST Returns and Adjudication Management System), online TCC application, online registration and payment of Professional Tax, N-GAIN (Nagaland GST Analytics and Intelligence Network), GST awareness campaigns, market surveys, compliance checks aser GST Registration Data Cleansing-Compliance Assessment & Market Survey (GRDC-CAMS) inyakyimtem tenzüka inyakdar ta parnoki ashi.

Taila invoices aser registrations anema inventory checks, inspection drives agir, aser Railway Parcel Office nung goods belenba mittsü atema counter ka lapoka lir. Item mapa ya Central GST aser State GST

ketdangpurtem tsüingda amalitepa inyaker ta Department-i Governor dang ashi.

Department of State Taxes-i inyaktetba mapa tongtipangtem rongnung in-house digital Professional Tax platform lir. August 6, 2026 tashi nung petroleum arrears Rs 17 crore bendentetogo aser külen Northeast nung mezügbuba Biometric Aadhaar Authentication Registration tenzükbaji Nagaland lir aser India nung 16 buba ta ketdangsürtemisa ashi.

Vision 2063 and Beyond kübok Department-i revenue ecosystem tajung ka yangertsü mangdang lir. 2030 tashi Rs Rs 2,400+ crore, 2038 tashi nung Rs 5,000+ crore, 2047 tashi nung Rs 11,000+ crore aser 2063 tashi nung Rs 50,000+ crore revenue bendentsü alizüngtem yua lir ta Department-isa metetdaksü.

Iba senden nung Finance Commissioner Kesonyu Yhome, IAS aser State Taxes Department ketdangsürtem aden.

CM Rio-i Amit Shah den FCRA tebilemtsütem lemsateper

Kohima, August 10, 2026 (TYO): Nagaland Chief Minister Neiphiu Rio-i Union Home Minister Amit Shah dangi Foreign Contribution (Regulation) Act (FCRA) yanglushitsüba atema tebilemtsütem lemsateper aser Arogotem o Khristan teloktem nungi shiditem züluba agizüktsü ayongzüko.

CM Rio-i FCRA nung temelenshi asütsüba nung tebilemtsü abenba onüktem angatettsü atema Nagaland Baptist Church Council (NBCC) aser Bishop of Kohima nungi Khristan lennirtem den ajurutepa senden ka menogo.

Nagaland nung Khristan nütsüng yongsük 90% tema lir aser arogotem o Khristan teloktemi education, healthcare, poverty alleviation, social welfare aser

humanitarian assistance nung tongti shilem agia arur. Talisa parnoki meta talang pilar alidak aser sensaker aliba tesemtem nung mapa jenti inyaker ta Rio-i Amit Shah dang ashi.

Item maparen aika ozüngi melaba foreign contributions ajanga nungita yarir aser FCRA compliance requirements kanga aika akümba ajanga arogotem aser charitable organizations nen senotsü aser ketdangsubaren nung khuret tulu agütsür ta pai shidi nung shia lir.

FCRA nung amendments kar bener arutsü aliba ajanga timtem tuluba kümdaktsütsü aser Nagaland nung welfare, educational, healthcare aser social-service programmes inyakba nung tetsükdaktsü bentsür arutsü ta CM Rio-isa ashi.

Arogo telok kar indang FCRA registrations renewal asütsü magizük lir aser iba ya tamangba yimsü melendaktsüba nung senotsü amshiba atema tai tonglokja lir ajisüka Nagaland nung maparen inyakba jungjunga asadangtsüla ta paisa ashi.

Nagaland nung tesüiba küm 150 tashi arogotem aser Khristan teloktemi education, healthcare aser humanitarian assistance agüja arur aser sorkari public welfare atema merangba nung maneni yariteper ta Rio-isa Shah dang ashi.

Anungji FCRA amendment bill ya Joint Parliamentary Committee (JPC) ka nem jungjunga asadangaktsütsüla aser sendaktepa alirtem den asükdangyatsü nüngdaker ta paisa ashi.

Mokokchung nung 2nd Round National Deworming Day tenzükogo



Dr. Limanaro DPO (UIP & RCH) ajanga August 10, 2026 nü GMS Salangtem, Mokokchung nung mezüngbuba Albendazole tablet agütsü dang tangokba noksa nung angur.

Dimapur, Luroi/August 10 (TYO): Mokokchung nung district level 2nd Round National Deworming Day tenzükba sentong Government Middle School Salangtem, Mokokchung nung August 10, 2026 nü agia liasü.

Yangji sentong tatsüka agiba mapang Dr. Limanaro DPO (UIP & RCH) ajanga kaketshirtem nem Deworming Day amungba nükjidong lemsatep aser ibai tanurtem temang tajungba kumdaktsütsü, nutritional status, shisaliok

angazütsü aser takum junga alitsü asoshi amunger aser arishi küm ka nungi 19 tsüngta tanurtem temang nung mesen tepsettsü nükjidong nung lir ta ashi.

Tsüngsem mesemi asayaba, moapu nung tepok indokba, teka menenba, chiyongsü aser tziü memürek amshiba ajanga tanurtemi timtem ajurur, ta lai ashi.

DPO ajanga kanga bolua aliba mesen, infection yimya tem, malnutrition, anemia, chiyongsü mechinüba, tepok kangshuba,

saktsünütsü atuba, saktsüba aser tepok aoba, tashi mait mesüra lulaba, temang tuoziük ajemba aser mesakmeküba amala indang rateta ashi. Ali nungi menatepba helminthes nungi jenbua alitsü atema tanurtem mürekmejua alitsü tongtipang, ta lai ashi.

Dr. Limanaro-i kaketshirtem dang deworming ajanga tajangziük anguba indang lemsatepa liasü.

Iba sülen kaketshir nem Albendazole tablet agüja liasü aser RBSK team Mokokchung ajanga temang repranga liasü.

UPSC coaching asoshi shimer atema orientation sentong agi



Dimapur, Luroi/August 10 (TYO): Planning & Transformation Department, Government of Nagaland ajanga Vajiram & Ravi, New Delhi nung UPSC coaching agitsü atema shimteta aliba candidates tem atema orientation sentong ka August 10, 2026 nü Nagaland Civil Secretariat Conference Hall, Kohima nung ayongzüka liasü.

Principal Secretary and Development Commissioner Y. Kikhetto Sema, IAS-i iba sentong nung shimteta aliba candidates tem den jembidang, tang parnok kaketshir ka süaka pai parnokji tarutsü ketdangsür aser lenir ama ajiteter aser State aniba aser nübur tenzükba nung tongtipang shilem agitsü, ta ashi.

Pai kaketshirtem dang Tsüngrem dak amangtsü, tsürabor aser pei dang tainba nisungtem akumtsübotsü, kanga meranga azüngtsü aser mapang shidak amshitsü ajungshia liasü. Meranga inyakba aser bendanga agütsüba ajanga takok angur, ta pai ashi aser tatidang agütsütsü asoshi renemba mapang yimya tajung amshia aser bendanga agütsütsü nenshia ashi.

State sorkari Chief Minister's

Corpus Fund (CMCF) kübok tesüba küm pezü tashi UPSC Civil Services Examination densema competitive examinations atema renemba lisopur kaketshirtem yaria arur, ta Sema-i ashi. Taküm densema iba ama kaketshir sponsor asüba nung sen 277 lakh shi indokogo, ta pai metetdaksü.

Senotsü peria meliaka sorkari maneni shisaliok aser capacity building nung senotsü indoka tesunep aser yimchiyimjung nung ajemdaker temelenshi aliba lokti yangertsü, ta ashi.

Vajiram & Ravi, New Delhi nung UPSC coaching agitsü atema tang batch asoshi sorkari sen 64.5 lakh lemsükja lir ta pai metetdaksü.

Candidates tem ya July 25 nü tatidang agiba sülen merit nung ajemdaker shim aser coaching mapang department-i tenük yoka reprangtsü aser attendance atema tajemba agi shilem 90 asütsüla, ta ashi.

Paisa candidates tem dang iba maongka tajungtiba nung agia pei tsürabur, nübur aser Nagaland asoshi konang bener arutsütsü ayongzüka liasü.

Joint Development Commissioner, Heinswading-i iba sentong nung

jembidang, UPSC coaching programme atema shima alir nem tenüngsang agütsü aser sorkari agütsüba maongka tajungtiba nung amshitsü ajungshia liasü. Selection process atema candidate 120 shi aruba nungi iba sentong atema parnok 30 shim ta ashi.

Linük nung civil services asoshi renemshiba nung Vajiram & Ravi, New Delhi ya linük nung tajungtiba rongnung ka lir, aser yangji coaching agiba ajanga angazütsü, tokteptsü aser linük tesem balala nungi kasa nisungtem den metetpelatsü sapang tajung agütsütsü, ta pai ashi.

Pai parnok dang bendanga agütsür yimya tajung amshia aser khuret angateta iba sentong agizütsü ajungmesoa liasü.

Iba sentong nung shimteta aliba candidates temi undertakings zülutep aser iba sülen sensaksemba, tajangshiba lemsatepba aser candidates temi asüngdangba tem jembitepba mapang liasü.

Candidates temia Nagaland sorkar aser Planning & Transformation Department dang iba ama maongka agütsüba atema pelaba lemsatepa liasü.

Advisor Yhome-i Kohima nung jana ketdangsüba tesemtem semdang

Dimapur, Luroi/August 10 (TYO): Advisor, School Education, Dr. Kekhrielhoulie Yhome-i Deputy Commissioner, Kohima, B. Henok Buchem; CEO, Kohima Municipal Council (KMC), Alemyapang Longchar aser tanga ketdangsürtem den külemi Kohima jila kübok Lerie aser Dzürüzou tesemtem nung jana ketdangsüba tesemtem August 10, 2026 nü semdanga liasü.

Ibai District Level Implementation and Monitoring Committee on Solid Waste Management Rules, 2026 ajanga Kohima nung jana ketdangsüba tesemtem semdangtsü mapang lateta aliba nung shilem ka ama semdanga liasü.

Parnoki Lerie nung Kohima Waste Management Plant mezüng semdang aser iba sülen Dzürüzou nung jana nangdena

aliba tesemi oa yangji jana indoktsü asoshi mera balala agiba asadanga liasü.

Tang aliba waste management facilities asadanga Solid Waste Management Rules, 2026 shidak inyadkatsütsü nükjidong nung parnoki item tesem ya semdanga liasü. Kasa mapang ketdangsür temi Kohima nung scientific yimya amshia jana anepaluba asadangtsü maongka ngua liasü.

Iba semdangba ya kanga tongtipang liasü, kechiaser Kohima nung municipal solid waste management system maneni tashi itshiba mapang ka lir.

Official project documents ajanga ashiba agi, Kohima nung anogoshi municipal waste ya 80-90 tonnes shi bendener, anungji kanga junga bendena bensatsü aser scientific yimya nung indoktsü nüngdakba ajiteter.

Niuland nung 16th Finance Commission Tied Grants senden amen



Dimapur, Luroi/August 10 (TYO): District Water and Sanitation Mission atema 16th Finance Commission (FC-XV1) Tied Grants amshitsü atema asadanga Niuland District Administration senden ka August 10, 2026 nü Deputy Commissioner, Niuland indang Conference Hall nung mena liasü.

Iba senden nung PHED aser RD department tem nungi district nung schemes aser projects balala inyakba indang osang tejangja agüja liasü.

Senden nung mendenpuba Deputy Commissioner, Niuland, T L Kiusumong ajanga ketdangsür aikati Niuland, Chumoukedima aser Dimapur district tem mapa repa abenba asoshi tenüngsang agütsü aser senden nung shilem tali tajungba

agitsü ayongzüka liasü.

Executive Engineer PHED Rural Division Dimapur, Nirrie Nisa-i 16th Finance Commission (Tied Grants) indang PowerPoint presentation agüja liasü.

Lai department balala ajanga yimtsüing sasep nung schemes aser projects balala inyakba osang tejangja agütsü aser WATSAN aser Village Council shilem aser inyakba indanga rasaa ashi.

Paudwal Elunglung, S.O. II RD Department ajanga 16th Finance Commission (Tied Grants) mapa kuma department-i inyakba, grant allocaton, VDBs temi inyakba national aser state scheme den grand lemsaa (tied & untied) maparen balala inyakba indang osang agüja liasü.

KCCI-i dokan tem mürektsü ayongzüker

Dimapur, Luroi/August 10 (TYO): District Administration ajanga tuyuba ama Kohima Chamber of Commerce & Industry (KCCI) ajanga Kohima Municipal Council kübok aliba dokan kibur aser business establishments ajunga dang pei building tejaklen aser lenmang tsütsü dokan tem whitewash aotsü aser sentsü tepshitsü ayongzüker.

Independence Day

nüngtem nung District Administration ajanga tuyuba ama iba maparen August 14, 2026 tashinung inyaksüla. Anungji KCCI-i shishilempar ajunga dang mapang shidak nung iba mapa inyaksü ayongzüker, ta KCCI-i ashi.

Maneni parnokisa Independence Day matongdang Kohima jila mürekmejuba nung yariteptsü shishilempar ajunga dang ayongzüka liasü.

Jharkhand nung kaketshirtemi state assembly tashi oa longkak ait



August 10, 2026 nü Ranchi nung kaketshirtemi JPSC-JSSC examination nung ochimashi anema Jharkhand assembly tsütsüleni longkak aita aodang tangokba noksa nung angur.

Ranchi, August 10 (Agencies): Hombarnü Jharkhand nung kaketshirtemi state Legislative Assembly süngküm tashi oa longkak aitogo. JPSC aser JSSC recruitment exams nung ochimashi anema kaketshirtemi tesüiba anogo aika longkak aita arudar. Hombarnü longkak aitertemi police-i tenokdangba ayuba alema oa longkak aitba mapang nung police-i tzü aser tear gas shells khalokja liasü. State sorkaribo, kaketshirtemi akhangba shilem 98 bo sorkari ataloktsüogo, ta

metetdaksü. Kaketshirtemi akhangba nung ajemdaker Chief Minister Hemant Soren-i aniba sorkari exam asembo thinentsüogo aser state CID-i taoba mapang JPSC chairperson L Khiangte puogo. Ano külen BJP nung lenirtem aser party nung inyakertemia Chief Minister Soren'er kima adenshia longkak aita liasü. Longkak aitba dak sendakba nung police-i taoba mapang CM aser BJP lenir Babulal Marandi puogo. All India Student's Association (AISA) National President Neha Bora leniba nung kaketshirtemi assembly

süngküm tashi ia longkak aita liasü. Tang Jharkhand nung Jharkhand Mukti Morcha (JMM)-i aniba sorkar nung Congress-a densema lir. Kaketshirtem aser sorkar na tsüngda senden aiben menogo aser sorkari takhangba aika agizükogo, ajisüaka kaketshirtemi maneni longkak aiter. Amongnüa sorkar den senden amenba mapang nung kaketshirtemi exam nung ochimashi ken otem bushisüngdangtsü atema CBI nem agütsütsüla, ta takhangba agütsüogo.

Slovenia nung Indian Embassy raksatsüba MEA-i aitsür

New Delhi, August 10 (Agencies): Hombarnü Ministry of External Affairs (MEA)-i Slovenia nung Indian Embassy raksatsüba sashia aitsüogo. MEA-i iba osangji Slovenia ketdangsertem nem metetdakja aibelenertem pua temerenshi agütsütsüla, ta takhangba agütsüogo. MEA-i sangdong ka ajanga, "India anemertemi Ljubljana, Slovenia nung onok indang

Embassy raksatsübaji onoki sashia aitsür. Vienna Convention kübok diplomatic office tem kümzüka ayutsüla. Onoki iba osang ya New Delhi aser Ljubljana nung aliba Slovenia ketdangsertem nem metetdakja aibelenertem pua temerenshi agütsütsüla ta metetdaksüogo. Onokisa ozüing benokba ketdangsertem dang telok balalai tesempa osang prokba aser osang tai prokba

nokdangtsü mepishiogo," ta metetdaksü. Taoba ita nung ang India's Ambassador to Slovenia, Amit Narang-i Slovenia Minister of Foreign & European Affairs, Tone Kajzer ajurua linük ana tsüngda tesendaktep tajungba akümtsü atema jembia liasü. June 24 nüa MEA Secretary (West) Sibi George-i New Delhi nung Slovenia National Day sentong nung shilem agia liasü.

Parliament nung Amit Shah-i telangzüba agütsütsü: Rijiju

New Delhi, Luroi/August 10 (Agencies): Hombarnü Parliamentary affairs minister, Kiren Rijiju-i, kaketshirtemi longkak aitba aser police-i parnok nokdangtsü atema inyaksangshiba dak sendakba nung Lok Sabha nung o lemteptsü atema sorkar renema dang lir; Union home minister Amit Shah-i telangzüba agütsütsü saka Opoosition-i senden toktsür maotsüla aser ola madoki angaa atatsüla, ta metetdaksü. Taoba ita Jantar Mantar nung kaketshirtemi longkak aйдang police-i tashiyim amshi, ta aija Opposition-i iba dak sendakba nung Amit Shah-i telangzüba agütsütsüla, ta akhanger.

Amit Shah Parliament House complex-ibo arur saka tesüiba anogo aika senden nung madenba atema opposition-i aitsür. Rijiju-i, sorkari iba onük nung o enteptsü melunga lir, saka Opposition-i senden nung timtem magütsütsüla aser yimyim mayimtsüla, ta ashi. Parliament House Complex nung BAC senden amenba sülen osangbenertem den jembidang Rijiju-i, "Onoki Lok Sabha nung kaketshirtem aser lanurtemi linük tesem balala nung longkak aitba aser police-i parnok nokdangtsü merangba dak sendakba nung sorkari telangzüba agütsütsü melunga lir, ta BAC (Business Advisory Committee) nem metetdaksüogo. Sorkar tenüing nung home minister-i telangzüba

agütsütsü," ta metetdaksü. Ajisüaka Opposition-i parnoki o entepba nung timi shilem agitsü, senden nung timtem magütsütsü, home minister-i telangzüba agütsübaji ola madoki angatsü aser senden nung yimyim mayimtsü, ta nangzüksüla, ta paisa metetdaksü. Tzüngluruwa mongpu senden ya July 20 nü tenzüka liasü, saka anti-paper leaks bill atema jembiba dak alaka senden junga magiteti arur. Public Examination (Prevention of Unfair Means) Amendment Bill, 2026 bo House anaprongla nung agizükogo. Iba dak alia House anaprongla nung o melemtepi bill ana agizük aser Lok Sabha senden nunga bill ana agizükogo. Tamasabo Opposition party temi NEET paper leak asüba aser Ayodhya nung Ram tekülem ki tenla auyaba onük nung longkak aita liasü. Iba sülen opposition-i police-i longkak aiter kaketshirtem dak tashiyim amshiba atema o enteptsü aser Ato kilonser Narendra Modi o home minister Amit Shah napronglai telangzüba agütsütsüla, ta akhanger. Lok Sabha nung Opposition lenir, Rahul Gandhi-ibo iba tatalokba ya Supreme Court-i ketdangsüa bushisüngdangtsüla, ta akhanger. Tang tashi nung Lok Sabha nung Bill 9 agizükogo saka bill ana atema dang o lemtepa liasü; tanüingba bill jibo o melemtepi agizük.



August 10, 2026 nü New Delhi nung Parliament House Complex nung AICC Tir, Mallikarjun Kharge den opposition lenirtem senden amendang tangokba noksa nung angur.

I-Day jakdang Delhi Police-i Operation Shastra kübok nisung 52 puogo

New Delhi, August 10 (Agencies): Independence Day atongtsü anogo ishika dang lia security akangshitsü nükjidong nung Delhi Police-i Operation Shastra tenzük aser iba operation kübok parnoki ozüing alema inyakertem aser raraba hadir shibelenertem aika puogo. Delhi police-i Aman Vihar, Prem Nagar, Begumpur, Kanjhawala, Prashant Vihar, Budh Vihar, K N Katju Marg,

South Rohini, Vijay Vihar aser North Rohini mita aoba mapang nung aibelener 52 apu, aser parnok ket nungi country-made pistols den cartridges aser kotari aika apu. Police-isa auyaba scooter ka aser mobile phone ka puogo. Police-i ozüing alema ayokba yi aika apu aser Excise Act, Gambling Act aser NDPS Act kübok ken o aika benoka bushisüngdang tenzükogo.

**AXIS BANK**

Axis Bank Limited
AC Market Building , 4th Floor , 1, Shakespeare Sarani ,
Kolkata – 700 071 ;

Public Notice for. Auction Of Pledged assets being Gold Ornaments

Talisa sen apurtem aser public dang ya sangdonger, tsünglanglen shia aliba accounts nung nangzüka aliba hon osettem Axis Bank-i tsünglanglen shia aliba Branch nung public auction asütsü.
Tsünglanglen shia aliba sen apurtemi Bank nem security atema hon agi yangluba osetem agüja ("Gold Loan Facility") Axis Bank Limited dang nungi credit facility agia liasü. Sen apurtem/Guarantors nem Demand Notice agüja sen apurtem/Guarantors dang Gold loan facility agiba atema sentsüh agüjang ta metetdakja liasü. Ajisüaka sen apurtem/Guarantors-i loan agiba sentsüji magütsütet nung bank-i hon osettem, talisa tsünglanglen schedule of property nung shia alibaji **11-09-2026** anogo nung anüngdang **11:00** ako nung "Kong aliar yamaji", "Kechi lidir yamaji", "Koma lidir yamaji" aser "No Recourse Basis" nung auction asütsüsa akümer. Auction ji yangi agitsü **Sen apurtem aser sentsüh osang tejangja**

Customer Name	Loan A/c No.	Amount Outstanding	Date of Demand Notice	Gross weight grams.	Net weight grams.
BRANCH_RAC_NAME- LHOMITHI BAZAR NL					
JALILUR RAJA KHAN	XXXXXXXXXXXX9540	706980.00	13/Jul/26	111.800	107.300
MARAN BISWAS	XXXXXXXXXXXX0058	228625.00	20/Jul/26	22.400	21.700
NAVNEET SINGH	XXXXXXXXXXXX1939	519699.00	13/Jul/26	61.800	51.100

TENDERATEMATELATETBATEM
Base/Reserve price ji tender asürtem nem auction anogo nung agütsütsü. Bid asütsü atema bank-i agütsüba prescribed tender form nung agütsüba bid/offers dang agizüksü. Bid form/tender nung mabensaba kar danga lira ibaji tamagitsü ta azüngshitsü aser magizüksüa akok.
Tender documents den telatetbatemji tekalen shia aliba branch nungi agizüksü. Tender document ji ajak renemba sülen **11-09-2026** anogo nung tim branch official nem office mapang nung agütsütsü. Anogo süladokba sülen agütsüba tenders magizüksü.
Shia aliba osettemji "Kong aliar yamaji", "Kechi lidir yamaji", "Koma lidir yamaji" aser "No Recourse Basis" nung auction asütsü. Shia aliba oset indang standard, purity mesüra sentsüh aser tax tagütsütsü lira iba atemaji Bank-i kuli magitsü.
Tekalen shia aliba auction anogo aser mapang nung offers dak sendakba raising/revising asütsü atema tender asürtem lia Bank-i tender lapoktsütsü.
Branch Tenüngtem Tekalen Shia Lir. Auction Anogo: 11-09-2026.
Offer/tender khi agütsübaji tanaben agientsü makok aser bid asütsüpurtemi temeja article/asset/ornament atema single bid/offer süra bid amount deposit asütsü.
Temeja article/asset/ornament kar atema bid ka dang teimba süra bid asütsüpurtem tsüngda inter-se bidding alitsü aser teimba bid asüsangji takok angur bidder ta sangdongtsü.
Bid asütsüpurtemi KYC documents ajak agütsütsüla i.e. PAN Number, PAN Card, Adhar Card & Address proof etc. Bid asütsüpurtemi E-mail ID aser Contact Number agütsütsüla
Offer agizüksütsü mesüra magizüksü atema Bank dak temeden lir.
Ayoktsü atema shia aliba property dak sendakba nung mangatettep kar danga adokra ibaji Mumbai nung aliba jurisdiction of Courts/ Tribunals nung dang bentettsü.
Date: 11.08.2026
Place: Kolkata

Authorized Officer,
Axis Bank LTD



TIR YIMYIM YIMOBILEM (EDITORIAL)

DIMAPUR TUESDAY, AUGUST (LUROI) 11, 2026

Kümlijungertemi alima raksar

Alima majung akümba ya tamajungertemi ochimashi aser tashiyim mapa inyakba agi masü saka nisung tajung, kümlijungertemi tamajung anema ola madokba ajanga lir ta jembia aruba shin o ya asen Nagaland daksa tapetba kümogo. Aji oda, nisung dang masü saka asenok jajaba lenmang aser mapa inyakba kiojen aser süng long ajak ochimashi aser tiyazü agi sünger aliba limaji asen Naga lima lir. Ashiko, asenok aika atema asenok senden aliba ki, asen mener jajaba gari, asenoki agiba süoshi aser asenoki achiba chiyongtsü ajak ya ochimashiba len nungi aruba rongsentem teimba asütsüa akok. Aji oda, ashiko, asen lima nungbo tenla ki dena ochimashiba sen agi yangluba tenla ki teimba asütsü südi. Iba ama tzü aser mopong dena ochimashiba agi sünger litepba lima ka nung ochimashi mapatem anema ola adoktsü memulungba nübortemji alar mesüra ochimashir kilirtem asütsü. Atangji, tanü Nagaland state renloknüseta merenlokba ya asenok aikati aiben yimten yimsüsürtem aser tulurtemi nübortem meyong shilem miimzüka agiba ajanga merenloker amai aija jembir, ajisüaka aija jembiba dak alaka shibai kechi mapa nung koma ochimashi inyak ta bushisüngdanga orr menokdaksüba aser metongshitsüba osangbo mangashir. Anungji, itemji bangpetsa jembiba mopong o ka dang akümer. Aji oda, ochimashi agi anogo shia mapa ka nung mesüra ka nungbo timtem takoksa ajurua jajaba lima ka nung, asenok kijaia aser lokti tentettemia ochimashi mapatem anema yimjak nung ola madoktetba ya tapi agi masü saka asenok ajak ochimashiba tashi agi alena lir ta sayur. Iba jagi tamajung aser ochimashi anema asenoki aremzüker amai ola madoker. Ajisüaka, tanü asen lima nung ochimashi mapatem anema nübortemi ola madoki aremzüka yabo akhi, normal, masü. Iba ama kümlijunger yabo tajung agi aremzükertem masü saka tasü maitertem mesüra asüng tia indang meshisadanger suwartem asütsü. Asenok ajemasüngba aser kümli ajungba yimyatem ya bilemdangang, asenok ajak tenüng nung senbo aru aser terenlok mapa inyaksü asoshi sen lemozütsü saka mapa meinyak ser senbo asenok tenüng nung kari agizüka agi, saka asenoki mejashir. Ibaji tajung tazü masü. Itemjibo temeimtsüka masü saka temenünütsüka, anungji tangari mezügmeshi süpet asütsü. Tanüa tesem kar nungbo kiojen meyanglu ser senbo agizüka agiba indang jembir. Item amaji, asenoki state government kübok department shia nung terenlok mapatem inyakba file reprangdanga odangra, ashiko, file nungbo Nagaland nungsa lenmanga tajungba aser teimba yanglua alitsüa akok. Kasaji file nungbo Nagaland sünga ango tzübo, playground, stadiums, park, multipurpose halls, coffee lu, rubber lu, süngjanglijang lu aser tourist spots agi sünga alitsüa akok. Item ajakji file nung kümlijungertem nem yanglutsüba terenlok mapatem lir. Item ama nübortem asoshi inyaksü melen nübortem ashiochtsüba mapatem anema nübortemi ola madokra, asüngbo kümlijungertemjia chiyongtsüa mangutsü aser teka nung senotsüa mali aser lenmanga maka, light-a marur ta amang nung shiruru ama tetsüng agi nemzütsüa adoktsü. Idangjibo, kümlijungertem ajak bok agi matu kongra-kongraa kümer, ola adokdi asüyonga tashi mali kümadoker asütsü. Atangji, tanü asenoki ajangshiba tensa tia ya nübortem asoshi dang masü saka shirnoki nübortem ashiochtsü, parnok asoshia mapang tajung ka atarbo masütsü. Kechiyong, alima nung ya kodang, nisung kar chiyongtsü maka saka karbo chirmechima endoker, nisung karbo talidaka maka saka karbo lir melima, nisung karbo temelentsü süoshia maka saka karbo agir magima ta asüba tensa ka agi lokti menepdir, kümlijungertema ain adoktsü aser kümlijungertem ain adokbajibo ajak atema lendong asütsü. Iba ama anogo kaji nübortem rongnung kümlijungertemia matatsüla aser ochimashirtemia meyanglutsüla.

OLEMSABANG

KOBA LINÜK NUNG YIMJUNG MALI IBA LINÜKJI TEJAKLENI MAOTSÜ

~ L. Kika Pongener

Alima nung alir nutsüng-nubur ajaki yimjung aginur aser yimjung nung linur. Koba linük nung nuburtem longjema, putepa, yimjung nung lidir; iba linükji lenla ajak nung renloka tejakleni aotsü. Koba linük nung nubur longjema yimjung nung lidir; iba linük nungjagi alima lennir, yimsüsur, kenshi-oshir aser alimai aka-ana ta züngshitsüsa aser metettsüsa alima lennir aser nungtuko lennir jenti adoktsü. Linük ka nung nutsüng-nuburtem yimjung nung sunepa alitsübaji; yimsüsuri nubur dang asü-anguma nema lur; nubur lenji-i oa; nubur dang meima yimsü asütsüla. Lokti nung lennir ajaki pei tata shilem teinyaksü mapa ajak shitak takok ngua inyaksüla aser pei temeden kechi lir; ibajagi temulung sur kati ka den sungpo aputepa lira; iba linük nungji telongjem, yimchi-yimjung, azükaro aser temoatsü alitsü. Iba linükji lenla ajak nung renloka tejakleni aotsü.

Asenoki tanü asenok aliba alima rangben tia reprangdangra....Linük aika nung raraba osang angashir aser angur....Alima nung rara adokba ya kodaser adoker (?) ta teraji bushidangra....Linük kati ka amokbanga ayutsü merangba; linük kati tangar ka litsü / arrtsü (Boundary) atsünga agitsü merangba; tashi sayutepba, tuluba shisangtepba aser pei temeden tim dak alia talila temeden raktepba....Iba amala mesukba kulitem agi alima nung rara ya teimba adoker. Ibaji mesuka, tanü asen lima nung; asen lokti nung; nubur tsüngda nung mepetmesu aser telemsa adokba tera ya bushidangra....Tamabur raktepba, pei temeden tim dak alaka talila arishiba aser penbuba, kati ka menden atsüngdoktsü merangba, tuluba shisangtepba aser tashi (Power) raktepba....Iba amala kulitem yagi lokti nung mepetmesu aser telemsa ya teimba adoker. Linük ka nung nuburtem tsüngda kati ka den ambangyima, tashiyim agi amokbangtsü meranga; tashiyim agi akoktsü meranga; kati ka aküm-metsübu; kati ka amokmerena tashi sayutepba....Ibajagipo, longjemtsü melena telemsa-ang tali adoktsü aser tesuleni talangka oa-adoktsü.

Linük ka nung yimsüsur aser lenniri pei ajangzüksüba dang nungipo; pei linük aser nubur taoba ta meima yimsü sura....Iba linükji yimjung nung sunepa alitsü. Linük ka nung yimsüsur aser lennirtemi pei linük aser nubur dang meimtsübaji ajak dang tongtipangba (Priority) sudaktsütsüla. Tejen putu nung Israel nunger chuba yimli nung; Solomon-er jabaso Rehobom chubai tebu den aliba tambur shisa tajung agutsür nungi masü; saka lanur tetoktak nisung; shirnoki alima raksatsü mapayui shisatsü tamajung agutsü....Item shisatsüji agir yimsü asüba agi Israel yimli ana küma lemsa. Tanü-a asen yimden aser lokti nunga kati ka tashiyim agi amokmerentepa, tuluba shisangtepa, kati ka tashiyim agi akoktsü merangra....Iba linükjibo kodanga yimjung nung sunepa malitsü aser tejakleni maotsü. Kechiyong tashiyim agi kodanga linük ka aser lokti ka meyanglushitettsü.

Alima otsü nung züngdangra....Chuba aser yimsüsur, shirnoki tashiyim agi yimsü asü, item chubatem aser lennirtemji tansutsü-ka aser tesusatsü-ka; anojungi taküm arishi tempangba angutsü. Babylon yimli nung chuba Nebukadnezzar shibai Yihova Tsüngrem külemertem reshikangshi aser tepset....Tsüngremi pa Nashi ama arem moapu nung rem mejakdaksü. Rom yimli nung Nero chuba shibai Khristantem kanga mejungi reshikangshi....Pa mesen agi ruseta asüba otsü lir. Iraq lima nung President Sadem Hussain aser Afghanistan lima nung tashiyim lennir Osama Bin Laden....Alima raksatsü mapayuba aser nubur dang memeimba yimsüsur....Tansutsü-ka anojungi taküm arishi tembangba alima nübur ajaki nguogo. Anungji yimden yimsüsur aser lennir ajaki nuburi akümtsübuttsüsa (Respect) alitsüla. Koba linük nung yimsüsürtemi rongsen aser tashi (Power) dak nendaker; kati ka akoktsü meranger.... Ashiko, khenbo takok angutsü sudi....Saka ashiko, iba takokji talangkabo mootettsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM Women Conference temoatsüma nung tembangogo



Impur, Luroi 10 (TYO): ABAM Women Conference 8buba Impur nung Luroi (August) 7-9, 2026 anogotem nung "Asen Atepzüng Tiptemdi" omen nung kanga temoatsü süa ajaki shilem tulu agia mungogo, ta ABAM Executive Secretary, Rev. Temsu Jamir-i sangdong ka ajanga metetdaksü.

Sentong balala nung Rev. Temsu Jamir, Executive Secretary of ABAM; Dr. Tsuknangrenla, Associate Professor, Clark Theological College, Aolijen aser ABAM Women Ministry Secretary Wt. T. Arenla Longkumer nungeri Tsüngrem O jembia liasü.

Parnoki tanü tetsür ka shilem ajanga kibong, lokti aser alima yanglutsü tashi indang jembiba den külemi tetsürtemi joko mejanga aliba nisungtem dak temulung melemi, ki alema adoka joko tetsürtem tashi amshitsü mapang, ta Lai O tapet bener arua tayongzükba tulu

agüja liasü. NBCC nung Women Secretary, Mrs. Katoli V. Sumi-i tayongzükba O jembidang, "Asenok kati ka aria bilema kati ka ajungketa yariteptsü mapang tongogo, kechiaser tanü amitsür onsara kümadokogo aser parnoki asen teyari nüngdaka lir. Anungji tanela O jembiba dang masü saka mapa küma inyakdi," ta ayongzüka liasü.

Mezüng aonung sentong nung "Kü Otsü" ashiba den "Taküm Tzü ayong" onük süa Lai tapet bener arua asaya balala asayaba den külemi tangu sadokdi mapang tajung agi. Iba denji külemi tongtipang tangazüktsü aika angazüka shi aser tanela ajunga ajungmesoa liasü.

Luroi 8 anogo nung lokti ajanga Libajen merüketba mapa inyaka, tamang aser mapa külemi aotsüji Tsüngrem nükjidong, ta ajaki temoatsü agiogo.

Tatembang anogo anepdang 5:00 ako nungi 8:00 ako tashi sarasadem benjong agia temoatsü tulu agia tanela nung iba sentong tembangtsüsa tenzüka liasü.

Kasa anogo nikongdang 1:30 ANNA telok (amitsür) sensaksem tajung agia Mrs. Limanaro, MTBA ajanga tajangshiba nungi lemsatapa taküm lenmang tia tejanga angatettsü O aika lemsatapa kangasa tongtipang shilem ka süa agi.

Iba sentong nung jangratemtsü kaji, kentener tejaoker "Tzüben Lung" telok arua sentep shia tanelar ken tajung atenba ajanga lokti ajungmesoa liasü.

Arogo 167 aser Fellowship 10 nungi tetsur ajak agi 1,083 liasü aser iba nungjagi amitsur 158 liasü. Tsüngremi maneni tetsürtemi alima yangluba nung shilem tulu agitsü moajangma.

ANOGO ABEN TSÜNGREM DEN

Shimtsü Nüji

"Aser Kibuba Tanela lir, aser kechi nung Kibuba Tanela lir, idakji nüjiba lir" (2 Kor. 3: 17)

Tanela agi sünga jajabaji temelaba agütsüba mesüra ozüngyim benshiba masü, saka nüji. Pauli ashi, "Pai tasen tezüngzüktepba tenzüker akümtsü onok peridaksür; ibaji tezüluba ozüng masü... kechi nung Kibuba Tanela lir, idakji nüjiba lir" (2 Kor. 3:6,7).

Asenok Tsüngrem den lungjemba agi anguba senti rongsen tajungtibaji Khrista nung nüji angubaji lir. Kibuba Tanela ne dak ali nung taküm alitsü asoshi shimtsübaji na nüji lir. Na tamalen aliba taküm ama shi nung mejajatsü ajungshir. Mesüra tanela nung jajatsü majungshir. Tanela-i mulungba ama mesüra shii mulungba ama jajatsü na nüji lir.

Tanela mulungba ama jajaba nung mapa ana keta lir. Mezüngbuba, ibai ola madoki alitsüba masü. Asenoki Tanela nung jajaba indang jembir, mena alitsü indang masü. Na tanela ainba nung lendong tulutibaji aser teraksa adokdaksübaji ola madoki alibaji lir. Ne mulungjang tetsüngda ka nung alibaji lir. Tsüngrem-i mulungba inyaktsü asoshi mener atabaji tanela nung aintsü asoshi Tsüngremer lenmang masü.

Tanabuba nung, asenoki tanela nung jajatsü jembir, asemtsüba masü. Tanela nung sünga aliba takümji tanela maka aniseta inyakba agi mangur. Meranga inyakba jagi Tanela agi sünga akümer ta asenoki aibelena bilemer. Ibaji tekolok mapa lir. Na jakla (immoral) mejungi kümdaktsüba ajanga Tsüngrem tenzükba anendaktsütsü makoktsü akok ta Satani bilemtsü akok, saka nü mapa nung na kanga mazüangi yutsüba ajanga na akoktsü.

Kibuba, tanü ne mera nung Tanelai mulungba ama ni jajatsü kü dang yariang.

Bible Society of Mexico (SBM) küm 60 ajungbamong amonger



August 10, 2026: Taküm Bible Society of Mexico (SBM) küm 60 ajungbamong amonger; tesüiba küm 60 tashi parnoki ajak ket nung pei oshi nung Laishiba alitsü atema kanga meranga inyaka arudar.

Bible Society of Mexico (SBM) ya 1966 küm tenteta liasü aser SBM ya United Bible Societies indang international fellowship shilem ka lir.

Laishiba oshi balala nung meyipzüktsü, menüngtsü aser alemtsü atema parnoki Arogotem aser Khristan organization balala den longjemer inyaker.

Tesüiba küm 60 tsüngda SBM-i Arogotem, seminaries, ministries aser tamangertem meyrjang aika yaria aruogo.

SBM Director, Jaime López Vízquez-i, "Iba organization indang mission ya kanga tongtibang. Tsüngremi Mexico nunger ajak ayimjemner. Teinyaktsü mapa aika lir aser onoki longjemer evangelical Arogo ajak yaritsü nüngdak. Kodang iba alizüngji tongdir onoki Laishiba tesayubatem nung ajemdaker iba linük nung temelenshi adokdaksütsü," ta ashi.

López-i, Arogotemi lanurtem dak rangloker inyaktsü kanga rongdak kümogo, ta ashi.

"Tsüngrem Oji taküm aser taküm nung kanga tongtibang, ta lanurtem aser tanurtem nem angatetdaksütsü dak sendakba nung onoki tayongzükba aika

ajangshir," ta Lopez-i ashi.

Technology ainba den külemi sobaliba tsütsü temelenshi kanga adokba den liromedema SBM-i digital platforms, artificial intelligence aser multimedia amshia lanurtem Lai O den sendakteptsütsü meranger.

SBM-isa nükpokertem atema 'Braille' resources agütsür.

Mexico linük temzüng ajanga yimsü temeden agütsür, ajisüaka evangelical Arogotem anema tenokdangba aika lir.

Mexico nung National Institute of Statistics and Geography (INEGI) census ajanga ashiba agi, linük tesem aika nung evangelical aser Protestant Arogotem kanga renlokogo, aser ibaji ajanga Khrista osangtajung proksü, nütsüngsütsü aser tamanger tasenpurtem nem training agütsütsü atema Laishiba resources kanga nüngdaker.

General Directorate of Religious Associations-i ashiba agi, tang Mexico nung yimsü dak sendakba association 10,600 jungnüa lir.

Ibaji ajanga Laishiba alemba tsütsü tayongzükba

jenti ajurur. Khristan organization balalai jila, yimti, yimtsüng aser lisopur aliba tesemtem nung oshi aser sobaliba balala nung ajemdaker Laishiba resources agütsütsü nüngdaker.

Oshi balala nung Laishiba meyipzükba maparen ya oshi ka nungi kati meyipba dangbo masü. Iba maparen renema inyaktsü atema mapang talangka agir; oshi balala jembirtem, Laishiba meyipzükertem aser lenirtem amalitepa inyaktsü nüngdaker.

Mexico nung lisopur oshi 68 lir aser iba nungjia oshi telemsa balala noklang aika lir.

Tang tashi nisung million aika ket nung pei oshi nung Laishiba mali, ibayongji SBM-i lisopurtem atema kanga meranga Laishiba meyipzüktsür.

Mazatec lisopur oshi meyipzüktsür, Benito Fernández Figueroa-i, "Iba ya nisungtem nem pei oshi nung Tsüngrem O metetdaksütsü atema apu latsüba mapa ka lir. Ixcatlñ nung tesüiba küm 18 tsüngda Laishiba azüngba ajanga nisung aika taküm melenshiba onoki nguogo," ta metetdaksü.

SBM-i tang tashi nung lisopur oshi 8 nung Laishiba meyipzüktsüogo; aser item oshitem rongnung Maya, Chol, Tzotzil, Tzeltal aser Mixe densema lir.

Mexico nung oshi balala nung Laishiba kanga nüngdaka akümba ya ajanga linük nung Arogo ainba kuli sayur.

Tesüiba küm 60 tsüngda SBM-i shisaliok agütsüba sentongtem, Bible education programs, matamabensartem atema Laishiba agütsüba maparen balala inyakba den külemi tanurtem, lanurtem aser kibongtem atema sentong balala ayongzüka katsür.

"Küm 60 tsüngda Laishiba million 374 lemtsüogo aser yimti 13 nung tenzükba maparen inyakba den külemi distribution centers amenoka lir," ta SBM Head of Distribution, Efrañ Amaro-i metetdaksü.

United Bible Societies nung Effectiveness executive director, Chris Egitto-i, "Tsüngremi SBM leniba atema pelar, aser maneni Pai yamaji inyaktsü. Tsüngrem O ajanga tesangwa maneni agütsüba kuli onoki angur," ta metetdaksü.

Houthi teloki al-Makha amak; nisung 7 tepsetogo

Sana, Luroi/August 10 (Agencies): Yemen nung Houthi teloki Temerem tzüyim tzüküm nung amendaka aliba yimti al-Makha (Mocha) missile aser drone amshia amakba sülen ano nisung tenet tepsetogo.

Al-Makha aser yimti indang commercial port maka nisung 11 tepsetba sülen ghonda 24 majung tsüngda Deobar nikongtsütsü Houthi puri ano iba yimti makogo. Yemen indang armed forces-i Hombarnü ashiba agi, lendong nung sepai pezü aser civilian asem tepsetogo aser nisung 30 yiruogo. Yirurtem ya timba ya civilian tem lir.

Military-i ashiba agi, air defence temi drone 11 khadanga liasü. Ano ballistic

missile ana khaloktsünüba tesem nung mekhaloktsüshi-i tzüyim nung tsükogo.

Houthi-affiliated Al Masirah TV-i lemsatepba video nung ballistic missile aser drone tem aika khaketa yokba sayuogo. Houthi military otongdar Yahya Saree-i ashiba agi, parnoki iba tesem nung Saudi nunger sepai aser prangbong injang bendena yua aliba tesem dak rangloker iba jenjang agiogo.

Military-i ashiba agi, Houthi puri civilian facility aser infrastructure tem, nisung aliba ki, electricity-generating stations aser yimti nung tanga tesem balala den military tamendakdak balala makogo.

Deobarnü al-Makha maka nisung 11 tepsetba sülen tang

ano tasüba atalokogo. Iba yimti amakba mapang rongnendak raksatsüogo. Ketdangsürtemi ashiba agi, ki balala aser commercial facility tem makogo. Kasa mapang nung Associated Press-ia port infrastructure, commercial goods aser chiyongtsü supply raksatsüba metetdaksüogo.

Sepaitemisa, parnoki bomb enoka bener aruba rong ka iba rongnendak raksatsütsü asoshi yokba nokdangogo.

Deobarnü asendenshir iba yimti amakba mapang National Resistance Forces-i, al-Makha nung alirtem dang parnok ki toktsür maotsü mepeshiba den taochi makai iba yimti nung missile khaloktsüba atema Houthi telok aitsüogo.

Hormuz lapoktsü atema US-i atsüanem akatsüla: Iran

Dubai, Luroi/August 10 (Agencies): Iran-i Oman den par linük ana tsüngta Strait of Hormuz ajanga rong senzütsü asoshi tezüngzüktep ka terenemer saka iba tongtipang tzü lenmang melapokdang compensation, tenokdangba agienba aser mitkar temi amokmerenba densema US-i tanga conditions tem shidak inyaktsüla, ta ashi.

Rara metenzükdang iba tzü lenmang ajanga aliba nung amshiba totzü aser liquefied natural gas shilem 20 shi bena liasü, saka US aser Israel nati February 28 nü nungi Iran amakba ajanga iba tzü lenmang shibanga totzü aser osettsüset jenjang timba kumdaaktsü.

Hombarnü Iranian Foreign Ministry odongtar Esmaeil Baghaei-i ashiba agi, iba strait ajanga rong senzütsü asoshi Oman den jembishinüba nung terenlok junga lir, aser shipping route mape indang tezüngzüktep ka yangluogo aser joint statement atema technical ken o kar metembangi lir.

Tehran nungi osangbener den jembidang, lendong timtem makai rong tem senzütsü, libajen wazüka ayutsü, maritime services aser mapa tamajung inyakba azüoktsü atema awajema jembi aser item services atema meyiper senotsü agütsütsü tim, ta pai ashi.

Deobarnü Iran indang Foreign Minister Abbas Araqchi-i Oman den tezüngzüktep tatembang jenjang ka nung lir ta ashi saka Tehran-i akhangba kar US-i magütsü tashi strait melapoktsü, ta shia liasü.

Iran aser US ya jembishinü makar aser June ita interim deal zülutepba Washington-i

raksa tashi jembishinü metenzüktsü, saka kar ajanga osang belenteper, ta Araqchi-i ashi.

US Tir Donald Trump-i Axios den sensaksema mapang Iran den US temai madoki inyakteper ta shia liasü. "Onok-i parnok den 'semi-negotiating' asür. Iran osettsüset nung jenjang tali akumba onoki repranga atar aser parnok ket nung sen maka."

Strait tanaben lapoktsü atema US-i Iran tesem ajungalen amakdang raksatsüba atema compensation agütsüba nung shilem ka keta lir, ta Araqchi-i ashi.

Iran indang national security body tematiba nung secretary menden yutsüsang Mohammad Baqer Zolqadr-ia US-i Iran anema tali amokmerenba tembangtsü, Iran, Lebanese, Palestinian, Yemeni aser Iraqi allies tsütsü tashiyim amshiba anentsü, Gulf nung US-i rong tem nokdanga aliba agientsü, Iran nem sanctions agüja aliba agientsü aser Iran nunger rongsen soita aliba salatsü ashi.

Deobarnü Iran-i taoba Revolutionary Guards commander Mohsen Rezaei-i iba tentet indang second-in-command mapa inyaktsü ta sangdonga liasü, shiba Zolqadr dang temulung teladakba lir.

Lenir melenba indang kuli kecha agüja mali aser policy nung temelenshi alitsü indanga mejangja.

Trump-i Iran dak amakba ya Islamic Republic-i nuclear nok-nü yangluba soittsü aser region nung amokmerentsü tashi ajemdaktsütsü nükjidong nung lir ta shia lir, ajisüaka November ita midterm

elections agitsü lia iba rara tatem kati arutsü kanga ajungshir.

Washington aser Tehran na June ita ceasefire ka yanglu, saka July ita Gulf nung Iran nunger rong tem nung US-i tenokdangba maneni agütsü, koba ajanga truce nung aibelener ta Tehran-i ashi.

"Tetsükdaaktsü makai shishilempaba rong tem senzütsü tezüngzüktep sangdongba sülen United States-i Iran nunger rongnendak nokdanga alibatem agientsü," ta US ketdangsür kati osangbener dang Hokulbarnü shia liasü.

US inyakyim ya Iran-i nangzükba ama mapa kuma inyakba dak sendaka lir, ta ketdangsüri ashi.

Iran nungeri Strait of Hormuz nung rong tem amakba den ano Yemen nung par tembar, Houthi telungpuri tali amaker, shirnoki Red Sea aser Gulf of Aden tsüngta Arabian Peninsula külen oil checkpoint ka nung rong tem dak tenük yoker.

Taoba ita Houthis-i Red Sean nung Saudi Arabia anema 'naval blockade' ka sangdonga liasü, koba Saudi-i Yemen nung par dak amakba asoshi telangzüba agütsüba lir ta ashir, saka Riyadh-i aji tiazü ta ashir.

Houthi aser Yemen nung sorkar meyong sepaitem tsüngta raraba tali kumogo, aser Red Sea nung rongnendak Mocha yimti nung Houthi teloki amakba mapang mitkar aser civilian densema nisung tenet tepset ta Yemen mitkari Hombarnü ashi.

Iba mapang shilem agiba Houthi drones 11 air defences ajanga khazüka yok, ta mitkari ashi.

SÜR KÜM KA AJUNGBA MENUNGRA BILEMTETER

Lt. K. Meyikazung Jamir



Tasüba Anogo: 11-08-2025

Na onok nungi pila-a tatem makadak limai or küm ka süitema arudang onok mulungjang nung teti menungrar, aser iba anogo bilemteta sarasadema amonger. Na tanü onok den meliaka ne temeim teti onok mulung nung alitsü. Nai teti meima aliba,

~ Temeim Kinungtsü, Chirnur, Semchir aser Kinungertem.

Myanmar-i ASEAN envoy menüngdaker: Foreign ministry



Foreign Minister Than Swe

Yangon, Luroi/August 10 (Agencies): Myanmar nung military-i teyari agütsüba sorkari ASEAN bloc indang special envoy menüngdakba metetdaksüogo. Linük tiri Thailand semdangba sülen anogo ishika lir iba ya atalokogo.

Myanmar aser Association for Southeast Asian Nations züngsemtem tsüngda tesendaktep ya 2021 küm military-i Aung San Suu Kyi-i aniba civilian sorkar atsüngtoka linük ajunga nung civil war tenzükba sülen mejungi kümogo. Iba rara nung nisung 100,000 shi tepsetogo aser million aika pei talidak ki toktsür jenshiogo.

Iba sülen Myanmar nunger lenirtem ASEAN sendentem nung shilem agitsü memelar, kechiyong parnoki yimjung atema iba bloc den onük pongu mulungtepba benoka minyak.

Hopta tatemi Myanmar indang foreign ministry-i ashiba agi, Myanmar atema ASEAN special envoy ka menüngdaki kümogo.

"ASEAN chair indang special envoy tasen ka shimtsü atema joko nüngdak mali ta Myanmar-i bilemer," ta Ministry sangdong ka ajanga metetdaksü.

December aser January ita agiba election ya linük aikati magizüker, koba military-i nongitba party kati kokogo, aser iba ajanga Myanmar

indang taoba junta lenir Min Aung Hlaing linük tir akümtsü atema lenmang lapoktsüogo.

Min Aung Hlaing-i taoba ita Bangkok semdangba sülen Thai Foreign Minister Sihasak Phuangketkeow-i, ASEAN' indang yimjung sentong nung shilem ka ama Thailand-i Myanmar tamendakdak akangshidaktsüner nung yimjung adokdaktsüner, ta ashi.

Ajsüaka Myanmar indang pro-military parliament-i taoba ita ASEAN sentong ya magizük aser ashiba agi iba ya parnok inyakyim nung jushiba ka. Parliament-isa, ASEAN-i par linük dak sendakba nung parnok tenokdakdak asadangshitsüla ta ashi.

ASEAN-i Hokolbarnü sangdong ka ajanga Suu Kyi aser International Committee of the Red Cross ketdangsür ka ajurutepba indang lemsatepogo.

Kasa sangdong ajangasa tang ASEAN envoy- Philippine foreign minister- aser Suu Kyi ajurutepdaktsütsü tejangraba aliba aser la chioaktsü takhangba agütsüogo.

Suu Kyi ya küm 18 atema tepuokdak yua lir. ASEAN-i la chioaktsü akhangba dak sendakba nung Myanmar foreign ministry-i ashiba agi, "sorkari la tepuokdak ayutsüba küm ajemtsüogo, saka la chioaktsüba yabo temzüng ozüing dak ajemdaker inyaktsü."

Sangphur FC-i Metümnyo Football Championship kokogo



Advisor Youth Resources & Sports (YRS) S. Keoshu Yimchunger-i Sangphur FC nem takok marok agütsüba noksa nung angur.

Dimapur, Luroi/August 10 (TYO): Metümnyo benjung amungba mapang "Inspiring youth, promoting sportsmanship" omen nung ajemdaker 4buba Metümnyo Festival Football Championship final August 8 nü Sangphur yimtsüng nung asayaogo. Iba asayamung ya Sangphur FC-i koka liasü.

Asayamung shibangba sentong nung Advisor Youth Resources & Sports (YRS) S. Keoshu Yimchunger alakteta jaoker liasü.

Sentong nung o jembiba

mapang Advisor-i, grassroot jenjang nung asaya ajungkettsü atema senotsü teyari agütsüba atema Department of Youth Resources & Sports dang kanga pelaba lemsatop.

Paisa, Department nükjidong tongtibangtibaji iba amala sentongtem ajanga local lokti tentet balala tongteta aotsü asoshi lir, ta ashi.

Maneni pai iba asayamung takok ngua ayongzüka asayaba atema Shamator District Football Association (SDFA) aser Sangphur Village Students Union dang kanga pelaba

lemsatop.

Pai asayartem dang meranga inyakttsü ajungshiba den peisasa azüokba ajanga nisung kati nükjidong tongteter ta ashi.

Ajak senteper 4buba Metümnyo Festival Football Championship nung club 16-i shilem agia liasü.

Asayamung nung jurila sempet angurtem yamai

alitsü:

Golden Glove: Kiutong Janger (Sangphur FC)

Golden boot: T. Dolun (Challenger FC)

Golden Ball: Lakiumong. S.

Canadian Open: Rybakina, Gauff aser Osaka nunger quarters-i iogo



Luroi/August 10, 2026 (Agencies): Deobarnü Toronto nung Elena Rybakina-i kanga meranga asayarang asaya koka Canadian Open quarterfinals tongtetogo. World No. 2 asayar yagi deciding set set nung 0-3 agi tesülen aliba nungi meyipa tur Liudmila Samsonova madak takok ngua liasü.

Elena Rybakina aser Liudmila Samsonova na asaya ya Rybakina-i 6-4, 4-6, 6-4 agi koka liasü.

Kazakh tsürla ya taruba asaya Grand Slam pezü koker alila Naomi Osaka den asayatsü, shibai Canada tsür

Leylah Fernandez 6-4, 6-4 agi koka liasü.

Kasa asayamung tetsür kija asaya nung Coco Gauff-ia asaya koka quarter final tongtetogo. Lai Russia tsür qualifier Alina Korneeva 6-3, 6-1 agi ayong ayonga koka 2023 küm sülen tang mezüngbuba Canadian Open quarterfinal tongtetogo.

America tsürla ya taruba asaya Belinda Bencic den asayatsü, shibai Alexandra Eala 6-4, 6-0 agi kokogo.

Philippines nungi asayar Eala-i taoba Hombarnü Washington nung la indang career nung mezüngbuba

WTA title bener liasü.

"Ni tanü asaya takaratiba nung tembangdaksütsü atema rangloker asayar," ta Gauff-i ashi, shibai Canada nung set ka nung danga tamakok mongui asaya arudar.

Osaka aser Fernandez na asaya nung Osaka-i set anaprongla nung game tenetbuba break süa quarterfinals tongtetogo.

"Ni junga asayatetogo. La tangatetba tajung lir. La kanga consistent aser lai tatem tashi raratsü. La ya bulldog mesüker," ta Osaka-i ashi.

Osaka shiba Rybakina den khen danga asayadanga mali, lai ashiba agi, taruba round nung la indang groundstroke kanga dang tongtibang asütsü.

Kasa mapang nung Bencic-i left-handed asayartem den kanga junga asaya arudar aser lai Eala-a minute 73 nung dang kokogo.

Swiss tsürla yagi la indang first serves shilem 64.4 takok ngua otetogo aser item point tem shilem 72.4 bo kokteta left-handed asayar den asaya 10buba atonga kokogo.

"Ni left-handed asayar tem den masayaner anungji statistic ya taoksatsüka," ta Bencic-i ashi.

Manas Dhamne India Davis Cup squad nung züngoksemogo

Luroi/August 10, 2026 (Agencies): India-i arishi küm 19 tain Manas Dhamne tang mezüngbuba Davis Cup squad nung züngoksemogo. India team September 18 aser 19 nü South Korea den Seoul nung asayatsü lir.

Qualifiers Round 2 ya kanga tongtibang lir, kechiyong iba asaya akoker ya November ita Bologna nung Davis Cup Final 8 nung asayatsü asoshi maongka angutsü.

World No. 362 Dhamne ya Sumit Nagal aser Dhakshineswar Suresh na den kija asaya atema shimogo. Tarep asaya nung Yuki Bhambri aser N Sriram Balaji na maneni asayatsü. Arnav Paparkar aser Sidharth Rawat na reserve asayar ama shimogo.

February ita Bengaluru nung Netherlands 3-2 agi akokba sülen squad nung Dhamne dang bendenlokogo. Iba asaya akokba ajanga India tang mezüngbuba 2019 küm Davis Cup format melenshiba sülen

second qualifying round atema qualify süogo.

South Korea den asaya atema Davis Cup squad:

Kija asaya: Sumit Nagal, Dhakshineswar Suresh, Manas Dhamne

Tarep asaya: Yuki Bhambri, N Sriram Balaji

Reserves: Arnav Paparkar, Sidharth Rawat

Netherlands den kanga junga asayaba sülen Dhakshineswar Suresh squad nung züngoksemogo. Arishi küm 26 tain asayar yagi kija asaya anaprongla akok aser pa Bhambri den külemi doubles rubber nunga asaya liasü.

Pai world No. 88 Jesper de Jong akokba sülen world No. 162 Guy Den Ouden 6-4, 7-6(4) koka team nem takok agütsü.

Kasa mapang nung South Korea-ia Argentina 3-2 agi koka liasü. Final 8 tonga elite stage nung mezüngbuba asayatsü atema India team-i Seoul nung kanga junga asayatsüsa akümtsü.

Jannik Sinner Cincinnati Open masayatsü

Luroi/August 10, 2026 (Agencies): World number one Jannik Sinner temekok tachichilen yiruba taneptsü junga mongutetba sülen Cincinnati Open nung masayatsü atema telemtetba agiogo, aser iba ajanga pa US Open atema renemshiba nung tetsükdaksü adokogo.

Italy nunger asayar yagi iba telemtetba agiba Deobarnü metetdaksüogo aser ashiba agi, pa medical team den inyakdar, saka tetoktepba balala nung shilem agütsü atema ano renema mali.

"Kü indang doctor aser team den asüngdangtepba sülen ni Cincinnati nung Masters 1000 tournament nungi atsüngintsü asoshi sangdongtsüsa kümogo," ta Italy nunger asayar yagi ashiba asayamung ketdangsürtemi metetdaksü.

"Kü indang medical team den kanga meranga inyakdar saka kü temekok tachichilen yagi tang tashi timtem agütsür. Ni tokteptsü atema renema mali ta agizüktsüsa kümogo. Cincinnati nung masayatetba atema ni kanga tezü adanger. Ni taruba küm arua asayatsü matateter aser ni tang U.S. Open atema renemtsü asoshi rangloker lir," ta pai shisem.

Cincinnati asayamung ya Brehostibarnü tenzüksü aser kasa anogo Montreal nung

Masters asayamung tembangtsü. Sinner ya temang nung timtem aliba ajanga Canada nung asayaba iba asayamung nunga masayar.

Grand Slam ponguben koker aliba asayar ya iba asayamung ana nungi matsügingin tsüngda Masters 1000 level trok tashi atonga koker liasü. Montreal nung asayamung nung shilem magütsü atema telemtetba agiba sangdongba mapang arishi küm 24 tain asayar yagi pa temang tama anepalutsü atema iba telemtetba agiogo ta ashi.

World number two Carlos Alcaraz-a tekanük yiruba ajanga iba asayamung nungi atsünginba sangdongba sülen tang Sinner-a Cincinnati nung masayatetsüsa kümogo.

Cincinnati Open aser Montreal Masters na ya season nung Grand Slam tatembangbuba US Open masaya tsüngda warm-up asayamung tongtibang ana ta züngshir. US Open ya August 30 nü tenzüksü.

Taoba ita Wimbledon akokba sülen Sinner khen danga asaya mali. Kasa mapang nung Alcaraz April ita tom nungi tang tashi khen danga masayai lir.

Temaba jenjang nung aliba asayar ana ya taoba küm US Open final asaya, koba arishi küm 23 tain Spain nunger asayar yagi koka liasü.

BILEMDANGANG

"Tamakok agi masü saka makoktsü ta bilemba agi nükjidong timba metongteter."